

編號 1 號

【線上學習】李秉璋原作

神奇、神奇真神奇，上課毋使趕，交通毋會塞，想愛學麼个，斯學麼个。先生在徕擇，時間在徕選，三更半夜嘛使得，先生講去心色又分明。佢使得係學生个先生，嘛使得做先生个先生，總講佢桃李滿天下，毋使準備拜師禮，毋使納學金，你想愛學，佢斯會教。

毋管你係巧神¹抑係慧當²，佢做下收。佢無擇學生、無擇時間、無擇所在，孤孤擇你，擇你想愛學个心。這係學習个革命，這係時代个轉變。來已急也已遽，跔得著大進步，親像身邊有仙人指點，武功大進步。

馬桶毋曉整有人教，鏈鋸毋會發，一步一步來，秘訣³教你知。網路線个接頭線路毋會閉翳⁴，有人教你色目愛分明，五花十色照順序，工具又特別，頭尾一下同佢夾落去，接頭一插網路通。

¹ 巧神：音 kiau[˥] shin[˥]；聰慧，屬具特殊能力的聰明。

² 慧當：音 ngong[˥] dong[˥]；形容人笨拙魯鈍。

³ 秘訣：音 bi[˥] gied[˥]；訣竅，指事物的要領、竅門。

⁴ 閉翳：音 hia⁺ bai⁺；翳張。

雖然講一個銀角毋會響，毋過先生大部分做下係自家在唱戲，講到口涎波潑，精神飽滿，笑頭笑面，親像做下斯毋會恹又有耐心！一遍教毋曉，過教一遍，你想愛學幾多到斯學幾多到，學到你自家無愛。

千里緣分一線牽，天下盡在吾彈指。現代生活真素絲，冷氣吹，彈指間，毋使出門、毋使尖車，想愛仰脣學斯仰脣學。斯算係疫情時節，學校个線上教學，略略無恁自由，毋過乜有人嶄然認真，緊聽課，緊查資料，正經係講一知三，師傅帶入門，修行看個人。上課資料自家留，毋使抄，三個快速鍵一搯⁵，滑鼠一箍，資料跔緊留落來。

當日上課紀錄先生有錄製。驚你單淨係「用手機上課等」，人毋知走到哪位去。因致先生上課會問問題，一半問，一半在點名，看若心有在無？認真上課个，回答無問題還會講頭斯知尾，無用心个也無問題，平平無問題，這個係毋知半項，所以無問題。連先生喊佢回答，佢斯像在人間消失，無鏡頭、也無回答聲，訊息欄項乜無留字，因致佢正經係「用手機上課等」。

線上學習，成就隨在人，逐儕有擇个自由，斯愛對自家个人生負責。對自家未來正經个大概，斯係同所有做下貢獻分現子時。今日个徕，成就天光日个徕。

⁵ 搯：音 ed[˥]；按、手用力向下擠壓。

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹个背尾升疏來，輝煌又晟目个金線射入天頂。佢踏緊該臺一騎斯響歸路个老鐵馬，來到吾个百果園，還話講今晡日頭一出來斯到位，算當早咧！無胚想，正踏入園肚，隔壁種大梨个阿權哥斯在該大聲咻咧！「喂！日頭恁高咧正到位哦，曾做有事？」

唉！佢都恁早咧，還輸佢，這阿權哥係歸暗晡毋使睡係無？做麼使得七早八早斯來到位？心肝還想緊，嘴項又毋肯認輸，對嘴斯應佢：「無啦！毋係來做事，來看鷓鴣得啦！」

吾个林園在山龍圍緊个窩肚，若堵著像今晡恁泥个好天時，打早斯會有三、四隻大鷓鴣，在四圍个山嶺頂飛啊飛。

同阿權哥个嘴鼓都還言搭煞，聽著遠遠个所在傳來「咻！咻！」个聲，鷓鴣出來咧！阿權哥看著鷓鴣出來，做緊个山園事頭也無掛做咧，跔核一陣來搨接梨个工人，坐在吾工寮个蔭影²下欣賞這齣大自然个表演。

看厥等閉閉長長个翼胛、跔緊燒氣，慢慢迂、定定盤，越迂

越高、緊盤緊遠，到尾變做天邊个一粒烏點，親像優雅个天頂王者，對天頂看落厥等守護个土地。

成半下，會看著厥等胸挺挺、目盯盯停在胥項个樹極頂高，好恬恬無聲無說斯從往落³，一瞬目轉身又飛往上，尖尖利利个爪項，夾緊一尾挨著神頭个蛇哥伯，斯一路「咻！咻！咻！」風神喋喋飛入密密个樹林裡肚。

又有成下，看厥等在高高个天頂迂來迂去，忽然間，兩片翼胛一收，對天頂直直墜往落，吾心肝肚還想緊：「這隻鷓鴣這下包穩死無命咧！」毋過，看佢硬硬都會撞著地泥咧，翼胛一閉、利爪一伸，黏時都頓恬个一瞬目時間，厥該雙利爪項，毋知哪時抓著一隻圍身還在扭啊扭个大老鼠，一轉身又飛到半天高咧！

歸陣人看鷓鴣表演看去嘴擘擘，有人講：「難怪，在這搭林園做恁久事頭，難得看著蛇哥，斯係有這兜鷓鴣守護這搭土地，戴在這四角圍个老嫩大細正有好安生生活啊！」

¹ 鷓鴣背：音 rhau` po` zui^ˊ；東勢東方山峰名，華語稱鷺嘴山。

² 蔭影：音 rhim` rhang^ˊ；陰影。

³ 從往落：音 zong` gong+ log^ˋ；往下俯衝。

【油籬蜂叨著記】李政暉原作

分油籬蜂叨著咧！

該朝脣去山頂巡水做事，無看著路脣个竹林內肚有大蜂窠，也無細義自家去撞著¹該支竹篙，歸陣个蜂尋著佢。惡桀桀²湧出來黏時斯飛到吾四圍，對吾圍身斯拊過來。佢陪著一隻，一看正知係油籬蜂驚都佢拊緊走，緊退緊陪圍身同頭那毛、面頂个蜂。退到無蜂个所在正試著頭那浮浮人怪怪，行轉屋家想歇睏下。

無幾久吾頭那、圍身、手髀同脣下開始會疾：頭那感覺像雲在天頂飄，又分人縹緲樣，暈³都無法度思考。左手巴掌腫去像紅龜板，手痺痺、手指尾會伸毋會鉤；坐毋核睡毋得，唉唉喲喲實在還艱苦。若係有陰間，該時節个佢應該係戴在內肚。

臨尾分人送去病院掛急診，講著有十外隻个蜂叨著佢了後，醫生認真同佢講：「普通來講油籬蜂叨著二十針以上，斯可能有危險，這款个蜂無解毒个血清、傷重个成下會引起過敏性失魂抑

係溶血个症頭，盡好愛先通知若屋家个人。醫生安排吊大筴⁴、注射同抽血，交代佢先歇睏下，若有麼个毋堵好愛黏時講。

等佢略略歇下了後，試著人加已好斯想愛轉去。毋過醫生愛佢加歇一駁觀察看，盡好等尿出來个尿色正常，若係變暗泥色斯較費氣愛送大間病院。愛過加等下，無麼个问题正使得出院。頭尾做下無問題醫生還係掛心講：「開个藥愛照三餐食，有麼个無快活斯愛遽兜倒轉來哦。」

轉屋家換衫褲時正知，總共叨著十六針，兩隻手髀發紅腫跳來，有罅癢。左手巴掌還係紅紅腫腫無感覺、頭那暈暈想睡。睡到半夜還緊爪，癢都硬硬愛同皮掀開、爪到骨頭髓。食藥、抹藥也無麼效，堵好有人紹介講臺灣有一種牛樟菇使得清肝解毒，無定著對蜂毒有效。食過該暗晡正經好睡毋會癢咧。

這滿蜂叨个所在既經結疤，看著這兜堅疤斯過一擺分佢想著：該時節个該兜蜂，佢一個人在山肚有幾危險。

¹ 撞著：音 dung` do`；接觸、碰到某物。

² 惡桀桀：音 og` kied` kied`；很凶惡的樣子。

³ 暈：音 ngong`；頭昏神智不清。

⁴ 吊大筴：音 diau` tai` gong`；吊點滴。